

## **¿QUIÉN LLEVARA'L GATU AL AGUA?**

- CARMELA.- Agora que t'alcuentro equí,  
voi a dicite una cosa.  
¿Nun sabes qu'ayeri Pinón  
llevóme al baille La Llosa?
- MARUXA.- Nun me digas, Carmelina.  
¿Cómo te pudo llevar?  
Porque a recostín de xuru  
que nun te pudo acarriar.
- CARMELA.- ¡Que graciosa me salisti!  
Pero va sentate mal,  
Porque bailló tola nueche  
conmigo y con naide más.
- MARUXA.- Por eso cuando venía  
per delante de to casa  
Golíame a callos quemaos:  
los qu'estropiasti na danza.
- CARMELA.- Paezme que te tas picando.  
¿Son los celos, Maruxina?
- MARUXA.- Si a min Pinón nun m'importa.  
¡Celos yo! ¿De quién, probina?
- CARMELA.- Eso quixera yo velo  
si lu tuvieres delante.  
Yeres capaz de ponete  
de rodielles por casate.
- MARUXA.- Eso ye lo que tu fadríes,  
si nun lo ficisti yá

pa que baillara contigo,  
si lo del baille ye verdá.

CARMELA.- Yá me ta a min apeteciendo  
el tirate de los pelos,  
y que lleve'l gatu al agua  
la que nun salga perdiendo.

MARUXA.- Carmela, tu lo dixisti,  
quien puea lu llevará,  
y que seyas bona moza  
nun tien de valite nada. (*Guerrien*)

CARMELA.- ¡Ai madre! ¡Ehí ta Pinón!  
Nun quiero qu'asina me vea.  
Si ehí te quies tu quedar,  
mal añu si me da pena. (*Vase CARMELA y entra PINÓN*).

PINÓN.- Hola Maruxa, ¿qué tal?  
Véote perarremangada.  
O vas riñir con daquién,  
o mucho vas trabayar.

MARUXA.- Lo que voi a facer yo,  
nun t'importa a ti pa nada.  
Que tu tolo quies saber,  
pero nun quies preguntar.

PINÓN.- Calma, Maruxa, por Dios.  
¿A min que me va importar?  
Si tu quies dicilo, dilo,  
y si non, pos a callar,  
que como tu yá pues ver,  
yo nun voi a reventar.

- MARUXA.- D'eso si m'allegaría,  
que reventares, rapaz,  
pero toi yo bien segura  
qu'esi alegrón nun me das.
- PINÓN.- Calma, Maruxa, por Dios,  
y has de decir lo que sientes,  
qu'ensin veme nun yes nada,  
y tas lloca si m'alcuentres.
- MARUXA.- ¿Qué ye lo que tas diciendo?  
Yá nun pueo aguantar más.  
A ti diote asoleyada,  
o bebisti dalgo de más.
- PINÓN.- Cuanto más te miro neña,  
¡Qué guapa tas enfadada!  
Pónesme'l corazón llocu,  
y hasta apapiello al falar.
- MARUXA.- ¿Que ye lo que tu dixisti?  
Fala más alto, rapaz.  
Tanto baxasti la voz,  
Qu'entender nun entendi nada.
- PINÓN.- Que si quies tu, vida mía,  
contigo me voi casar.
- MARUXA.- ¡Gracies a Dios, cariñín,  
que yá nun aguantaba más!  
Hala, mio prenda dorada,  
a la casa parroquial. (*Salen del brazu*)
- CARMELA.- Si nun lo veo nun lo creyo.  
Paezme que voi reventar.

¡Llevar asina al mio Pinón  
esa bruxa esmelenada!